



詩所第十五卷

四言古詩

漢

諷諫詩

蕭孟

肅肅我祖國自豕常黼衣朱紱四牡龍旂彤弓斯征撫
 寧遐荒總齊羣邦以翼大商迭彼大彭勳績惟光至于
 有周歷世會同王赧聽譖實絕我邦我邦既絕厥政斯
 逸賞罰之行非繇王室庶尹羣后靡扶靡衛五服崩離
 宗周以墜我祖斯微遷于彭城在予小子勤諛厥生阨
 此嫚秦耒耜斯耕悠悠嫚秦上天不寧乃眷南顧授漢
 于京於赫有漢四方是征靡適不懷萬國攸平乃命厥

弟建侯于楚俾我小臣惟傳是輔矜矜元王恭儉靜一
 惠此黎民納彼輔弼享國漸世垂烈于後迺及夷王克
 奉厥緒一作咨命不永惟王統祀左右陪臣斯惟皇士
 如何我王不思守保不惟履冰以繼祖考邦事是廢逸
 游是娛犬馬悠悠是放是驅務此鳥獸忽此稼苗烝民
 曰匱我王以媮所弘匪德所親匪俊唯囿是恢唯諛是
 信踰踰諂夫諤諤黃髮如何我王曾不是察既藐下臣
 追欲縱逸媮彼顯祖輕此削黜嗟嗟我王漢之睦親曾
 不夙夜以休令聞穆穆天子照臨一作下土明明羣司
 執憲靡顧正遐由近殆其怙茲一作嗟嗟我王曷不斯

思匪思匪監嗣其罔則彌彌其逸岌岌其國致冰匪霜
 致墜匪媮瞻惟我王時一作靡不練興國救顛孰違悔
 過追思黃髮秦繆以霸歲月其徂年其逮耆於赫君子
 庶顯于後我王如何曾不斯覽黃髮不近胡不特鑒

在鄒詩

微微小子既耆且陋豈不牽位穢我王朝王朝肅清唯
 俊之庭顧瞻余躬懼穢此征我之退征請于天子天子
 我恤矜我髮齒赫赫天子明哲且仁懸車之義以泊小
 臣嗟我小子豈不懷土庶我王寤越遷于魯既去禰祖
 惟懷惟顧祁祁我徒戴負盈路爰戾于鄒鬻茅作堂我

從一作徒我環築室于牆我既遷逝心存我舊夢我瀆上

立于王朝其夢如何夢爭王室其爭如何夢我王弼寤

其外邦歎其喟然念我祖考泣涕其漣微微老夫咨既

遷絕洋洋仲尼視我遺烈濟濟鄒魯禮義唯恭誦習絃

歌于異他邦我雖鄙耆心其好而我徒侃爾樂亦在而

誠子詩

東方朔

明者處世莫尚于中優哉游哉於道相從首陽為拙柳

惠為工飽食安步以仕代農依隱玩世詭時不逢才盡

身危好名得華有羣累生孤貴失和遺餘不匱自盡無

多聖人之道一龍一蛇形見神藏與物變化隨時之宜

無有常家

自効詩

常玄成

赫矣我祖侯于豕韋賜命建伯有殷以綏厥績既昭車

服有常朝宗商邑四牡翔翔德之令顯慶流于裔宗周

至漢羣后歷世肅肅楚傅輔翼元夷厥駟有庸惟慎惟

祇嗣王孔佚越遷于鄒五世壙僚至我節侯維我節侯

顯德遐聞左右昭宣五品以訓既耆致位惟懿惟與厥

賜祁祁百金洎館國彼扶陽在京之東惟帝是留政謀

是從繹繹六轡是列是理威儀濟濟朝享天子天子穆

穆是宗是師四方遐邇觀國之輝茅土之繼在我俊兄

四言古詩 卷十五
惟我俊兄是讓是形於休厥德於赫有聲致我小子越
留於京惟我小子不肅會同媯彼車服黜此附庸赫赫
顯爵自我隊之微微附庸自我招之誰能忍媿寄之我
顏誰將遐征從之夷蠻於赫三事匪俊匪作於蔑小子
終焉其度誰謂華高企其齊而誰謂德難厲其庶而嗟
我小子于貳其尤隊彼令聲申此擇辭四方羣后我監
我視威儀車服唯肅是履

戒子孫詩

於肅君子既令厥儀一作儀德服此溫恭棣棣其則咨予小
子既德靡逮曾是車服荒嫚以隊明明天子俊德烈烈

不遂我遺恤我九列我既茲恤惟夙惟夜畏忌是申供
事靡惰天子我鑒登我三事顧我傷隊爵復我舊我既
此登望我舊階先后茲度漣漣孔懷司直御事我熙我
盛羣公百僚我嘉我慶于異卿士非同我心三事惟難
莫我肯矜赫赫三事力雖此畢非我所度退其罔日昔
我之隊畏不此居今我度茲戚戚其懼唯嗟一作我後人
命其靡常靖共爾位瞻仰靡荒慎爾會同戒爾車服無
媯爾儀以保爾域爾無我視不慎不整我之此復惟祿
之幸於戲後人惟肅惟栗無忝顯位以蕃漢室

廸志詩

傅毅

咨爾庶士迨時斯勗日月逾邁豈云旋復哀我經營營力靡及在茲弱冠靡所樹立於赫我祖顯于殷國貳迹阿衡克光其則武丁興商伊宗皇士爰作股肱萬邦是紀奕世載德迄我顯考保膺淑懿績修其道漢之中葉俊乂式序秩彼殷宗光此勳緒伊余小子穢陋靡逮懼我世烈自茲以墜誰能革濁清我濯漑誰能昭闇啓我童昧先人有訓我訊我誥訓我嘉務誨我博學爰率朋友尋此舊則契闊夙夜庶不懈忒秩秩大猷紀綱庶式匪勤匪昭匪壹匪測農夫不怠越有黍稷誰能云作者之居息二事敗業多疾我力如彼遵衢則罔所極二志

靡成聿勞我心如彼兼聽則溷於音於戲君子無恒自逸徂年如流鮮茲暇日行邁屢稅胡能有迄密勿朝夕聿同始卒

與劉伯宗絕交詩

朱穆

北山有鴟不潔其翼飛不正向寢不定息饑則木攬飽則泥伏饕餮貪汚臭腐是食填腸滿膝嗜欲無極長鳴呼鳳謂鳳無德鳳之所趨與子異域永從此訣各自努力

答客詩

桓麟

邈矣甘羅超等絕倫伊彼楊烏命世稱賢嗟予蠢弱殊

才偉年仰慙二子俯媿過言

客示桓麟詩

亡名氏

甘羅十二楊鳥九齡昔有二子今在桓生

答對元式

蔡邕

伊余有行爰戾茲邦先進博學同類率從濟濟羣彥如雲如龍君子博文貽我德音辭之集矣穆如清風

答卜元嗣

斌斌碩人貽我以文辱此休辭非余所希敢不酬答賦誦以歸

述志詩

仲長統

飛鳥遺跡蟬蛻亡殼騰蛇棄鱗神龍喪角至人能變達士拔俗乘雲無轡騁風無足垂露成幃張霄成幄沆瀣當餐九陽代燭恒星豔珠朝霞潤玉六合之內恣心所欲人事可遺何為局促

大道雖夷見幾者寡任意無非適物無可古來繚繞一作繞

繞委曲如瑣百慮何為至要在我寄愁天上埋憂地下叛散五經滅棄風雅百家雜碎請用從火抗志山樓一作

西游心海左元氣為舟微風為柁翱翔太清縱意容冶一作一云春雲為馬秋風為駟按之不遲勞之不疾

離合作郡姓名字詩

孔融

漁父屈節水潛匿方離魚字與昔進止出行施張離日字

呂公磯釣闔口渭傍離口字九域有聖無土不王離或字

好是正直女回于匡離子字海外有截隼逝鷹揚合成六

翩將奮羽儀未彰離高字蛇龍之螫俾也可忘離虫字玫

璇隱曜美玉韜光離玉字無名無譽放言深藏離與字按

響安行誰謂路長離才字合成舉

述昏詩

秦嘉

羣祥既集二姓交歡敬茲新昏六禮不愆羔鴈總備玉帛
弋弋君子將事威儀孔閒猗兮容兮穆矣其言紛彼婚媾禍福之由
衛女興齊褒姒滅周戰戰兢兢懼

德不仇神啓其吉果獲令攸我之愛矣荷天之休

贈婦

曖曖白日引曜西傾啾啾雞雀羣飛赴楹皎皎明月煌煌
列星嚴霜悽愴飛雪覆庭寂寂獨居寥寥空室飄飄桂帳
熒熒華燭爾不是居帷帳何施爾不是照華燭何為

植杖詩

陳留老父

龍不隱鱗鳳不藏羽網羅高懸去將安所

魏

黎陽作二首

文帝

朝發鄴城夕宿韓陵霖雨載塗輿人困窮載馳載驅沐
雨櫛風舍我高殿何為泥中在昔周武爰暨公旦載主
而征救民塗炭彼此一時唯天所讚我獨何人餘不靖
亂

殷殷其雷濛濛其雨我徒我車涉此艱阻遵彼洹湄言
刈其楚班之中路塗潦是御鞿鞢大車載低載昂嗷嗷
僕夫載仆載僵蒙塗冒雨沾衣濡裳

朔風詩 五章

陳思王植

仰彼朔風用懷魏都願騁代馬倏忽北徂凱風永至思
彼蠻方願隨越鳥翻飛南翔

四氣代謝懸景運周別如俯仰脫若三秋昔我初遷朱
華未晞今我旋止素雪云飛
俯降千仞仰登天阻風飄蓬飛載離寒暑千仞易陟天
阻可越昔我同袍今永乖別

子好芳草豈忘爾貽繁華將茂秋霜悴之君不垂眷豈
云其誠秋蘭可喻桂樹冬榮

絃歌蕩思誰與銷憂臨川慕思何為泛舟豈無和樂游
非我隣誰忘泛舟愧無榜人

矯志詩

芝桂雖芳一作芳難以餌烹尸位素餐難以成名磁石

樹雖香

引鐵於金不連大朝舉士愚不聞焉抱壁塗乞無為貴
寶履仁邁禍無為貴道鴛雛遠害不羞卑棲靈虬避難
不耻污泥都蔗雖甘杖之必折巧言雖美用之必滅濟
濟唐朝萬邦作孚 逢蒙雖巧必得良弓聖賢一作主雖
知必得一作亦待英雄螳螂見歎齊士輕戰越王軾蛙國以
死獻道遠知驥世偽知賢覆之幬之順天之矩澤如凱
風惠如時雨口為禁闥舌為發機門機之闔楛矢不追

應詔詩

二首第二首 一云元會詩

肅承明詔應會皇都星陳夙駕秣馬脂車命彼掌徒肅
我征旅朝發鸞臺夕宿蘭渚芒芒原隰祁祁士女經彼

公田樂我稷黍爰有樛木重陰匪息雖有餽糧饑不遑
食望城不過面邑不游僕夫警策平路是由玄駟藹藹
揚鑿漂沫流風翼衡輕雲承盖涉澗之濱緣山之隈遵
彼河澣黃坂是階西躋關谷或降或升駢駟倦路載寢
載興將朝聖皇匪敢晏寧弭節長驚指日遄征前驅舉
燧後乘抗旌輪不輟運鑿無廢聲爰暨帝室稅此西墉
嘉詔未賜朝覲莫從仰瞻城闕俯惟闕庭長懷永慕憂
心如醒

初歲元祚吉日惟良乃為嘉會宴此高堂

一有尊卑列叙典而有章

二衣裳鮮潔黼黻玄黃

一有清醑盈爵中坐騰光二句

珍膳雜選克溢

圓方一有笙磬既設琴瑟俱張俯視文軒仰瞻華梁願

保茲善一作喜千載為常歡笑盡娛樂哉未央皇室一作家

榮貴壽考無疆一云壽若東王

上責躬詩

於穆顯考時惟武皇受命于天寧濟四方朱旗所拂九

土披攘玄化滂流荒服來王超商越周與唐比蹤篤生

我皇奕世載聰武則肅烈文則時雍受禪于一作炎漢君

臨萬邦萬邦既化率由舊則廣命懿親以藩王國帝曰

爾侯君茲青土奄有海濱方周于魯車服有輝旗章有

叙濟濟雋乂我弼我輔伊予小子恃寵驕盈舉挂時網

動亂國經作藩作屏先軌是隳傲我皇使犯我朝儀國

有典刑我削我紕一作黜將寘于理元兇是率明明天子

時惟篤類一作時類不忍我刑暴之朝肆違彼執憲哀予

小臣一作子改封充邑于河之濱股肱弗置有君無臣荒

淫之闕誰弼予身煢煢僕夫于彼冀方嗟予小子乃罹

斯殃赫赫天子恩不遺物冠我玄冕要我朱紱光光大

一作天使我榮我華剖符授玉一作土王爵是加仰齒金璽

俯執聖策皇恩過隆祗承休惕咨我小子頑兇是嬰逝

慙陵墓存愧闕庭匪敢傲德實恩是恃威靈改加足以

沒齒昊天罔極生一作性命不圖常懼顛沛抱罪黃墟願

蒙矢石建旗東嶽庶立毫釐微功自贖危軀授命知足
免戾甘赴江湘奮戈吳越天啓其衷得會京畿遲奉聖
顏如渴如饑心之云慕愴矣其悲天高聽卑皇宵照微

閨情

有美一人被服織羅妖姿艷麗芬若春華紅顏譁擘雲
髻差峩彈琴撫節爲我絃歌清濁齊均旣亮且和取樂
今日遑恤其他

妬詩

嗟爾同衾曾不是志寧彼冶容安此妬忌

觸髅詩

牢落冥冥與道相駟隱然長寢其樂無踰

思親詩

爲潘文則作

王粲

穆穆顯

一作皇

妣德音徽止思齊先姑志侔姜妣躬此勞

瘁鞠予小子小子之生遭世罔寧烈考勤時從之于征

奄邁不造殷憂是嬰咨于靡及退守祧祊五服荒離四

國分爭禍難斯逼救死于頸嗟我懷歸弗克弗逞聖善

獨勞莫慰其情春秋代逝于茲九齡緬彼行路焉託予

誠予誠旣否委之于天庶我顯

一作剛

妣克保遐年壘壘

惟懼心乎如懸如何不弔早世徂顛於存弗養於後弗

臨遺愆在體慘痛切心形景尸立魂爽飛沈在昔蓼莪

哀有餘音我之此譬憂其獨深胡寧視息以濟于今巖巖叢險則不可摧仰瞻歸雲俯聆飄回飛焉靡翼超焉靡階思若流波情似坻頽詩之作矣情以告哀

贈蔡子篤

翼翼飛鸞載飛載東我友云徂言戾舊邦舫舟翩翩以泝大江蔚矣荒塗時行靡通慨我懷慕君子所同悠悠世路亂離多阻濟岱江行邈焉異處風流雲散一別如雨人生寧正願其弗與瞻望遐路允企伊佇烈烈冬日高蕭初寒辨在淵歸鴈在軒苟非鴻鵬孰能飛翻雖則宣瞻望東路慘愴增歎率彼江流爰逝

靡期君子信誓不遷于時及子同寮生死固之何以贈行言授斯詩中心孔悼涕淚漣洏嗟爾君子如何勿思

贈士孫文始

天降喪亂靡國不夷我暨我友自彼京師宗守盪失越用遁違遷于荆楚在漳之湄在漳之湄亦克晏處和通篋墳比德車輔既度禮義卒獲笑語庶茲永日無讟厥緒雖曰無讟時不我已同心離事乃有逝止橫此大江淹彼南汜我思弗及載坐載起惟彼南汜君子居之悠悠我心薄言慕之人亦有言靡日不思矧伊嫵婉胡不悽而晨風夕逝託與之期瞻仰王室慨其永歎良人在

外誰佐天官四國方阻俾爾歸藩爾之歸藩作式下國
無日蠻裔不虔汝德慎爾所主率由嘉則龍雖勿用志
亦靡忒悠悠澹澹鬱彼唐林雖則同域邈其迥一作深
白駒遠志古人所箴允矣君子不遐厥心既往既來無
密爾音

贈文叔良

翩翩者鴻率彼江濱君子于征爰聘西隣臨此洪渚伊
思梁岷爾行孔邈如何勿勤君子敬始慎爾所主謀言
必賢錯說申輔延陵有作僑盼是與先民遺跡來世之
矩既慎爾主亦廸知幾探情以華覩著知微視明聽聰

靡事不惟董褐荷名胡寧不師衆不可蓋無尚我言梧
宮致辯齊楚構患成功有要在衆思歡人之多忌掩之
實難瞻彼黑水滔滔其流江漢有卷允來厥休二邦若
否職汝之由緬彼行人鮮克弗留尚哉君子異于他仇
人誰不勤無厚我憂惟詩作贈敢詠在舟

報趙淑麗

一作報趙叔嚴

應瑒

朝雲不歸夕結成陰離羣猶疑作獨宿永思長吟有鳥孤
棲哀鳴北林嗟我懷矣感物傷心

遠戍勸戒詩

繁欽

肅將王事集此揚土凡我同盟既文既武郁郁桓桓有

規有矩務在和光同塵共垢各竟其心爲國蕃輔間間
行行一作術術非法不語可否相濟闕則云補

贈梅公明

瞻我北園有條者桑遘此春景旣茂且長氤氲吐葉柔
潤有光黃條蔓衍青鳥來翔日月其邁時不可忘公子
瞻旃勳名乃彰

答贈詩

邯鄲淳

我受上命來隨臨菑與君子處曾未盈期見召本朝駕
言趣期羣子重離首命于時餞我路隅贈我嘉辭旣受
德音敢不答之余惟薄德旣局且鄙見養賢侯於今四

祀旣庇西伯永誓沒齒今也被命義在不俟瞻戀我侯
又慕君子行道遲遲體逝情止豈無好爵懼不我與聖
主受命千載一遇攀龍附鳳必在初舉行矣去矣別易
會難自強不息人誰獲安願子大夫勉簣成山天休方
至萬福爾臻

贈傅休奕

二首

程曉

熒熒獨夫寂寂靜處酒不盈觴肴不掩俎厥客伊何許
由巢父厥醴伊何玄酒瓠脯

三光飛景玉衡代邁龍集甲子四時成歲權輿授代徐
陳蕩穢元服初嘉萬福咸會赫赫應門嚴嚴朱闕羣后

揚揚庭燎晷晷

答弟叔夜

嵇喜

飾車駐駟駕言出遊南厲伊渚北登邛丘青林華茂青
鳥羣嬉感悟長懷能不永思永思伊何思齊大儀凌雲
輕邁託身靈螭遙集芝圃釋轡華池華木夜光沙棠離
離俯漱神泉仰噉璫枝結心皓素終始不虧

襍詩

嵇康

微風清扇雲氣四除皎皎亮月麗于高隅興命公子攜
手同車龍驥翼翼揚鑣踟躕肅肅宵征造我友廬光燈
吐輝華幔長舒鸞觴酌醴神鼎烹魚絃超子野歎過綿

駒流詠太素俯讚玄虛孰克英賢與爾剖符

幽憤詩

嗟余薄祜少遭不造哀煢靡識越在緇綵母兄鞠育有
慈無威恃愛肆姐不訓不師爰及冠帶憑寵自放抗心
希古任其所尚託好老莊賤物貴身志在守樸養素全
真曰余不敏好善闇人子玉之敗屢增惟塵大人含弘
藏垢懷耻民之多僻政不由已惟此褊心顯明臧否感
悟思愆怛若創痛欲寡其過謫議沸騰性不傷物頻致
怨憎昔慙柳一作下惠今愧孫登內負宿心外惡良朋仰
慕巖鄭樂道閒居與世無營神氣晏如咨予不淑嬰累

多虞匪降自天寔由頑疎理弊患結卒致囹圄對答鄙
訊繫此幽阻實耻訟寃免一作時不我與雖曰義直神辱
志沮澡身滄浪豈云能補嗷嗷鳴鴈奮翼北遊順時而
動得意忘憂嗟我憤歎曾莫能儔事與願違遘茲淹留
窮達有命亦又何求古人有言善莫近名奉時恭默咎
悔不生萬石周慎安親保榮世務紛紜祇攪予情安樂
必誠乃終利貞煌煌靈芝一年三秀予獨何爲有志不
就懲難思復心焉內疚庶勗將來無馨無臭采薇山阿
散髮巘岫永嘯長吟願性養壽

酒會詩 六首

淡淡流水淪胥而逝汎汎栢舟載浮載滯微嘯清風鼓
檝容裔放櫂投竿優游卒歲

婉彼鴛鴦戢翼而遊俯睭綠藻託身洪流朝翔素瀨夕
棲靈洲搖蕩清波與之沈浮

流詠蘭池和聲激朗操縵清商遊心大象傾昧修身惠
音遺響鍾期不存我志誰賞

歛絃散思遊釣九淵重流千仞惑餌者懸猗與莊老棲
遲永年寔惟龍化蕩志浩然

肅肅冬風分生江湄却背華林俯泝丹坻含陽吐英履
霜不衰嗟我殊觀百卉具腓心之憂矣孰識玄機

四言古詩 卷十五
猗猗蘭藹殖彼中原綠葉幽茂麗葢穠繁馥馥蕙芳順
風而宣將御椒房吐薰龍軒瞻彼秋草悵矣惟騫

贈秀才入軍

一作兄秀才公穆入軍贈詩十八首

鴛鴦于飛蕭蕭其羽朝遊高原夕宿蘭渚邕邕和鳴顧
眄儔侶俛仰慷慨優游容與

鴛鴦于飛嘯侶命儔朝游高原夕宿中洲交頸振翼容
與清流咀嚼蘭蕙俛仰優游

泳彼長川言息其滄陟彼高岡言刈其楚嗟我征邁獨
行踽踽仰彼凱風涕泣如雨

泳彼長川言息其沚陟彼高岡言刈其杞嗟我獨征靡
瞻靡恃仰彼凱風載坐載起

穆穆惠風扇彼輕塵奕奕素波轉此遊鱗伊我之勞有
懷佳人寤言永思寔鍾所親

所親安在舍我遠邁弃此蓀芷襲彼蕭艾雖曰幽深豈
無顛沛言念君子不遐有害

人生壽促天地長久百年之期孰云其壽思欲登仙以
濟不朽攬轡踟躕仰顧我友

我友焉之隔茲山岡誰謂河廣一葦可航徒恨永離逝
彼路長瞻仰弗及徙倚彷徨

良馬旣閑麗服有暉左攬繁弱右接忘歸風馳電逝躡

四言古詩 卷十五 十一
景追飛凌厲中原顧盼生姿

攜我好仇載我輕車南凌長阜北厲清渠仰落驚鴻俯引淵魚盤于游田其樂只且

凌高遠盼俯仰咨嗟怨彼幽繫邈爾路遐雖有好音誰與清歌雖有姝顏誰與發華仰訊高雲俯託輕波乘流遠遁抱恨山阿

輕車迅邁息彼長林春木載榮布葉垂陰習習谷風吹我素琴交交黃鳥顧儔弄音感悟一作寤馳情思我所欽心之憂矣永嘯長吟

浩浩洪流帶我邦畿萋萋綠林奮榮揚暉魚龍澆澗山鳥羣飛駕言出遊日夕忘歸思我良朋如渴如饑願言不獲愴矣其悲

息徒蘭圃秣馬華山流磻平阜垂綸長川日送歸鴻手揮五絃俯仰自得游心太玄嘉彼釣叟得魚忘筌郢人逝矣誰與盡言

閒夜肅清朗月照軒微風動桂組帳高褰旨酒盈樽莫與交歡鳴琴在御誰與鼓彈仰慕同趣其馨若蘭佳人
不存能不永歎

乘風高遊遠登靈丘託好松喬攜手俱游朝發太華夕宿神州彈琴詠詩聊以忘憂

四言古詩 卷十五
琴詩自樂遠遊可珍含道獨往弃智遺身寂乎無累何
求於人長寄靈嶽怡志養神

流俗難悟逐物不還至人遠鑒歸之自然萬物爲一四
海同宅與彼共之予何所惜生若浮寄暫見忽終世故
紛紜棄之八成澤雉雖饑不願園林安能服御勞形苦
心身貴名賤榮辱何在貴得肆志縱心無悔

詠懷詩

三首

阮籍

天地網緼元精代序清陽曜靈和風容與明日映天甘
露被宇翦鬱高松猗那長楚草蟲哀鳴鶴鷓振羽感時
興思企首延佇於赫帝朝伊衡作輔才非允文器非經
武適彼沅湘託分漁父優哉游哉爰居爰處

月明星稀天高氣寒桂旗翠旌珮玉鳴鸞濯纓醴泉被
服蕙蘭思從二女適彼湘沅靈幽聽微一作遠誰觀玉顏

灼灼春華綠葉含丹日月逝矣惜爾華繁

清風肅肅修夜漫漫嘯歌傷懷獨寐寤言臨觴拊膺對
食忘餐世無萱草令我哀歎鳴鳥求友谷風刺愆重華
登庸帝命凱元鮑子傾蓋仲父佐桓回濱嗟虞敢不希
顏志存明規匪慕彈冠我心伊何其芳若蘭

贈稽康

四首

郭遐叔

每念邁會惟日不足昕往宵歸常苦其速歡接無厭如

四言古詩 卷一五 十九
川赴谷如何忽爾將適他俗言駕有日巾車命僕思念
君子溫其如玉心之憂矣視丹如綠

如何忽爾超將遠遊情以怵惕惟思惟憂展轉反側寤
寐追求馳情運想神往形留心之憂矣增其勞愁

不見可欲使心不亂譬彼造化抗無崖畔封疆畫界事
利任難唯予與子鮮一作籍不同貫交重情親欲面無算

如何忽爾時適他館明發不寐耿耿極旦心之憂矣增
其憤怨

天地悠長人生若忽苟非知命安保旦夕思與君子窮
年卒歲優哉逍遙幸無隕越如何君子超將遠邁我情

願關我言願結心之憂矣良以忉怛

吳

獻詩

薛瑩

惟臣之先昔仕于漢奕世緜緜頗陟臺觀暨臣父綜遭
時之難卯金失御邦家毀亂適茲樂土庶存子遺天啟
其心東南是歸厥初流隸困於蠻垂大皇開基恩德遠
施特蒙招命拯擢泥污釋放巾褐受職剖符作守合浦
在海之隅遷入京輦遂升機樞枯瘁更榮絕統復紀自
微而顯非願之始亦惟寵遇心存足止重值文皇建號
東宮乃作少傅光華益隆明明聖嗣至德謙崇禮遇兼

四言古詩 卷一五
加惟渥惟豐哀哀先臣念竭其忠洪恩未報委是以終
嗟臣蔑賤惟昆及弟幸生幸育託綜遺體過庭旣訓頑
蔽難啟堂構弗克志存耦耕豈悟聖朝仁澤流盈追錄
先臣愍其無成是濟是拔被以殊榮翊忝千里受命南
征旌旗備物金革揚聲及臣斯陋實闇寔微旣顯前軌
人物之機復傳東宮繼世荷輝才不逮先是忝是違乾
德博好文雅是貴追悼亡臣冀存遺類如何愚胤曾無
髣髴瞻彼舊寵顧此頑虛孰能忍媿臣實與君夙夜反
側克心自論父子兄弟累世蒙恩死惟結草生誓殺身
雖則灰隕無報萬分

賦席

張純

席爲冬設簟爲夏施揖讓而坐君子攸宜

賦犬

張儼

守則有威出則有獲韓盧宋鵲書名竹帛

賦弩

朱異

南嶽之幹鍾山之銅應機命中射隼高墉

晉

從武帝華林園宴

二章

荀勗

習習春陽帝出乎震天施地生以應仲春思文聖皇順
時秉仁欽若靈則飲御嘉賓洪恩普暢慶乃衆臣

其慶惟何錫以帝祉肆覲羣后有客戾止外納要荒內
延卿士簫管詠德八音咸理凱樂飲酒莫不宴喜

前題 九章

應貞

悠悠太上民之厥初皇極肇建彝倫攸敷五德更運膺

籙

一作應錄

受符陶唐既謝天歷在虞

於時上帝乃顧惟眷光我晉祚應期納禪位以龍飛文
以虎變玄澤滂流仁風潛扇區內宅心方隅回面

天垂其象地耀其文鳳鳴朝陽龍翔景雲嘉禾重穎藁

莢載芬率土咸序

寧

一作人胥悅欣

恢恢皇度穆穆聖容言思其順貌思其恭在視斯明在

聽斯聰登庸以德明試以功

其恭惟何昧且不顯無理不經無義不踐行捨其華言
去其辯游心至虛同規易簡六府孔修九有斯靖

澤靡不被化罔不加聲教南暨西漸流沙幽人肄

一作肆

險遠國忘遐越裳重譯充我

一作切

皇家

峩峩列辟赫赫虎臣內和五品外威四賓修

一作順時貢

職入覲天人備言錫命羽蓋朱輪

貽宴好會不常厥數神心所受

一作授

不言而喻於是肄

一作肆

射弓矢斯御發彼五的有酒斯飫

文武之道厥猷未墜在昔先王射

一作躬

御茲器示武懼

荒過亦爲失凡厥羣后無懈于位

勵志詩

九章

張華

大儀幹運天廻地游四氣鱗次寒暑環周星火旣夕忽
焉素秋涼風振落熠燿宵流

吉士思秋寔感物化日與月與荏苒代謝逝者如斯曾
無日夜嗟爾庶士胡寧自舍

仁道不遐德輔如羽求焉斯至衆鮮克舉大猷玄漠將
抽厥緒先民有作貽我高矩

雖有淑姿放心縱逸出般干游居多暇日如彼梓材弗
勤丹漆雖勞樸斲終負素質

養由矯矢獸號于林蒲蘆繁繳神感飛禽末伎之妙動
物應心研精躋道安有幽深

安心恬蕩棲志浮雲體之以質彪之以文如彼南畝力
耒旣勤蔗蓂致功必有豐殷

水積成川載瀾載清土積成山歆蒸鬱冥山不讓塵川
不辭盈勉爾一作志含弘以隆德聲

高以下基洪由纖起川廣自源成人在始累微以著乃
物之理經牽之長實累千里

復禮終朝天下歸仁若金受礪若泥在鈞進德修業輝
光日新隰朋仰慕予亦何人

祖道趙王 應詔

崇選穆穆利建明明一作德於顯穆親時惟我王稟姿自
然金質玉相光宅舊趙作鎮冀方休寵曲錫備物煥彰
發軔上京出自天邑百寮餞行縉紳具集軒冕峩峩冠
蓋習習戀德惟懷永歎弗及

祖道征西 應詔

赫赫大晉奄有萬方陶以仁化曜以天光貳跡陝西實
在我王內飪玉鉉外惟鷹揚四牡揚鑣玄輅振綬庶寮
羣后餞飲洛湄感離歎悽慕德遲遲

太康六年三月三日後園會 四章

暮春元日陽氣清明祁祁甘雨膏澤流盈習習祥風啟
滯導生禽鳥翔逸卉木滋榮纖條被綠翠華含英

於皇我后欽若昊乾順時省物言觀中園讌及羣辟乃
命乃延一作初筵合樂華池被濯清川汎彼龍舟泝游洪源

一作泝渚游源

朱幕雲覆列坐文茵羽觴波騰品物備珍管絃繁會變
用奏新穆穆我皇臨下渥仁訓以慈惠詢納廣神好樂
無荒化達無垠

咨予微臣荷寵明時忝恩于外攸攸三期犬馬惟慕天
實為之靈啓其願邀願在茲于以表情爰著斯詩

答程曉

傅玄

奕奕兩儀昭昭太陽四氣代升三朝受祥濟濟羣后
我聖皇元服肇御配天垂光伊州作弼王室惟康
顒顒兆民蠢蠢戎羶率土充庭萬國奉蕃皇澤雲行
神化風宣六合咸熙遐邇同歡赫赫明明天人合和
下罔遺滯焦朽斯華矧我良朋如玉之嘉穆穆雖
雖與頌作歌

宴會詩

日之既逝情亦既渥賓委餘歡主容不足樂飲
今夕溫其如玉

芙蓉

煌煌芙蓉從風芬葩照以皎日灌以清波陰結其實
陽發其華金房綠葉素株翠柯

孝經詩 二章

傅咸

立身行道始於事親上下無怨不惡於人一作不孝無
終始不離其身三者備矣以臨其民
以孝事君不離令名進思盡忠義則不爭臣救其惡災
害不生孝悌之至通於神明

論語詩 二章

守死善道磨而不磷直哉史魚可謂大臣見危授命能
致其身

四言古詩 卷十五 二十五
克已復禮學優則仕富貴在天爲仁由已以道事君死而後已

毛詩詩 二章

無將大車維塵冥冥濟濟多士文王以寧顯允君子大猷是經

聿脩厥德令終有俶勉爾遐思我言維服盜言孔甘其何能淑讒人罔極有覲面目

周易詩

卑以自牧謙尊而光進德修業既有典常暉光日新照于四方小人勿用君子道長

周官詩 二章

惟王建國設官分職進賢興功取諸一作易直除其不蠲無敢反側以德詔爵允臻其極

辨其可任以告于正掌其戒禁治其政令各修乃職以聽王命

左傳詩

事君之禮敢不盡情敬奉德義樹之風聲昭德塞違不殞其名死而利國以爲已榮茲心不爽忠而能力不爲利啗古之遺直威黜不端勿使能植

贈褚武良

四言古詩 卷十五 二十一
爰暨于褚惟晉之禎肇振鳳翼羽儀上京聿作喉舌納
言紫庭光贊帝道敷皇之明方任之重實在江揚乃授
旄鉞宣曜威靈悠悠遐邁東夏于征

贈崔伏二郎

英妙之選二生之授顥顥兩城歡德之茂君子所居九
夷非陋無狹百里而不垂覆人之好我贈我清詩示我
周行心與道期誠發自中義形於辭古人辭讜豈不爾
思

贈建平太守李叔龍

弘道興化實在良守悠悠建平皇澤未流朝選於衆乃

子之授南荆注望心乎克副

贈太尉司馬虞顯機

帝崇元淑妙選其屬命子是佐增袞之縟

與尚書同僚

非望之寵謬加于已猥授非據奄司萬里煌煌朱軒服
驥驟驟曄曄初星肅肅臣僕暉光顯赫衆目所屬斯之
弗稱匪榮伊辱質弱尚父受任鷹揚德非樊仲王命是
將百城或違無能有匡一州之矜將弛其綱得意忘言
言在意後夫惟神交可以長久我心之孚有盈于缶與
子偕老豈曰執手出司萬一作百里牧彼朔濱服冕乘軒

六轡既均威風先邁百城肅震

答樂弘詩

序曰安樂令樂弘太傅鉅平侯羊公辟未就而公薨後應司州之命舉秀才博文通濟之士余失和於府當換為護軍司馬賦詩見贈答之云爾

鉅平作宰是貴是欽弓旌仍招嘉命胥尋鸞鳳養儀戢翼幽林未附雅調以和韶音鉅平遐逝厲志彌深肅肅京司清風裁邁乃延羣彥龍集鳳會亦既斯降萬里有賴聲發響應好結傾蓋

答潘尼詩

序曰司州秀才潘正叔識通才高以文學溫雅為博士余性直而處清論褒貶之任作詩以見規雖褒飾之舉非所敢聞而斐粲之辭良可樂也答之雖不足以相訓報所謂去盡各言志也

貽我妙文繁春之榮匪榮斯尚乃新其聲吉甫作頌有馥其馨寔由樊仲其德克明授此瓦礫厠彼瑤瓊既非其喻聞寵若驚

失題

奕奕恒山作鎮冀方伊趙建國在岳之陽

大蜡詩

裴秀

日躔星紀大呂司辰玄象改次庶衆更新歲事告成八

蜡報勤告成伊何年豐物阜豐禋孝祀介茲萬祐一作景福

報勤伊何農功是歸穆穆我后矜茲烝黎宣力菑畝沾

體暴肌飲饗清祀四方來綏充物郊甸鱗集京師交錯

四言古詩 卷十五 二十一
貿遷紛葩相追摻袂成幕連衽成惟有肉如丘有酒如
泉有肴如林有貨如山率土同懽和氣來臻祥風叶順
降祉自天方隅清謐嘉祚日延與民優游享壽萬年

祖道 應令

王濬

侯誰在矣東宮洗洗曰保曰傅弘道維新前疑協衡顧
問翼輪豈伊張仲專美前津渙乎唐德欽在四鄰齊軌
上葉永垂清塵

補亡詩

六首序曰哲與同業疇人肄修鄉飲之禮然所咏之詩或有義無辭音樂取節闕而不備于是進想既往存思在昔補著其文以綴舊制

束哲

循彼南陔言采其蘭眷戀庭闈心不遑安彼居之子罔

或游盤馨爾夕膳潔爾晨餐循彼南陔厥草油油彼居
之子色思其柔眷戀庭闈心不遑留馨爾夕膳潔爾晨
羞有獺有獺在河之涘凌波赴汨噬魴捕鯉嗷嗷林鳥
受哺于子養隆敬薄惟禽之似勗增爾虔以介丕祉

右南陔

孝子相戒以養也

白華朱萼被于幽薄粲粲門子如磨如錯終晨三省匪
惰其恪白華絳趺在陵之陬蓊蓊士子涅而不渝竭誠
盡敬疊疊忘劬白華玄足在丘之曲堂堂處子無營無
欲鮮侔晨葩莫之點辱

右白華

孝子之潔白也

黽黽重雲習習一作輯輯和風黍華陵巔麥秀丘中靡田不

播九穀斯豐奕奕玄霄濛濛甘雷黍發稠華禾一作挺

其秀靡田不殖九穀斯茂無高不播無下不植芒芒其

稼參參其穡穡我王委克我民食玉燭陽明顯猷翼翼

右華黍 時和歲豐宜黍稷也

蕩蕩夷庚物則由之蠢蠢庶類王亦柔之道之既由化

之既柔木以秋零草以春抽獸在于一作在草魚躍順流

四時遙謝八風代扇纖阿案晷星變其躔五緯不愆一作

逆六氣無易悄悄我王紹文之跡

右由庚 萬物得由其道也

瞻彼崇丘其林藹藹植物斯高動類斯大周風既洽王

猷允泰漫漫方輿迴迴洪覆何類不繁何生不茂物極

其性民永其壽恢恢大圓茫茫九壤資生仰化于何不

養人無道天物極則長

右崇丘 萬物得極其高大也

肅肅君子由儀率性明明后辟仁以為政魚游清沼鳥

萃平一作干林濯鱗鼓翼振振其音賓寫爾誠主竭其心

時之和矣何思何修文化內輯武功外悠

右由儀 萬物之生皆得其儀也

答阮得猷

棗據

四言古詩 卷十五 三十
友朋顧之貽我良箴玩之無斃終詠斯音燕鼎在舟雖
重不沈庶憑嘉謀高迹可尋

贈摯仲治

杜育

之子于歸言秣其駒矧乃斯人乃邁乃徂雖非顯甫餞
彼百壺雖非張仲將膾河魚人亦有言貴在同音雖曰
翻飛曾未異林顧戀同枝增其慨心望爾不遐無金玉
音

答杜育

摯虞

越有杜生旣文且哲龍躍潁豫有聲彰澈賴茲三益如
琢如切好以義結友以文會豈伊在高分定傾蓋其人
居懷戀結好心焉悵如

雍州詩

於皇先王經啓九有有州惟雍居京之右土載奧區山
包一作荷神藪嘉生惟繁庶類伊阜悠悠州域有華有戎
外接皮服內含岐豐周餘旣沒夷德未終莫不慕義易
俗移風

洛水祖王公

應詔

何劭

穆穆聖王體此慈仁友于之至通于明神遊宴綢繆情
戀所親薄云餞之于洛之濱嵩崖巖巖洪流湯湯春風

四言古詩 卷十五 三十一
動衿歸鴈和鳴我后饗客鼓瑟吹笙舉爵惟別聞樂傷
情嘉宴既終白日西歸羣司告旋鸞輿整綏我皇重離
頃轡駢駢臨川永歎酸涕霑願崇恩感物左右同悲

平吳後三月三日華林園詩

王濟

蠢爾長虵荐食江汜我皇神武汎舟萬里迅雷電邁弗
及掩耳思樂華林薄采其蘭皇居偉則芳園巨觀仁以
山悅水爲智歡清池流爵秘樂通玄修習灑鱗大庖妙
饌物以時序情以化宣終溫且克有肅初筵嘉賓在茲
千祿永年

賜餞東堂詔令賦詩

李密

人亦有言有因有緣官無中人不如歸田明明在上斯
語豈然

贈皇甫謐

辛曠

顛顛朝士亦孔其依莫不遲想載渴載饑我弓我旌禮
亦無違企望高岡來儀來歸其歸伊何與帝同心明明
天子如日之臨臨照四方探賸幽深山無逸民水無潛
鱗爰被一作彼九臯克量德音茂哉先生皇實是欽

周詩

序曰周詩者南陔白華華黍由庚崇丘由儀
六篇有其義而亡其辭湛續其亡故云周詩
也

夏侯湛

既殷斯虔仰說洪恩夕定晨省奉朝侍昏宵中告還雞

四言古詩 卷十五 三十一
鳴在門孳孳恭誨夙夜是敦

贈妹九嬪悼離詩

左思

鬱鬱岱清海瀆所經陰精以靈爲祥爲禎峨峨令妹應
期誕生如蘭之秀如芝之榮總角岐嶷亂齟夙成比德
古烈異世同聲惟我惟妹寔惟同生早喪先妣恩百常
情女子有行實遠父兄骨肉之恩固有歸寧何悟離析
隔以天庭自我不見于今二齡穆穆令妹有德有言才
麗漢班明朗楚樊默識若記下筆成篇行顯中閨名播
外藩何以爲贈勉以列圖何以爲言申以詩書相去在
近上下歎歎含辭滿胸鬱鬱煩不舒

皇太子宴玄圃宣猷堂有令賦詩 陸機

三正迭紹洪聖啓運自昔哲王先天而順羣辟崇替降
及近古黃暉旣愉素靈承祐乃眷斯顧祚之宅土三后
始基世武丕承協風旁駭天晷仰澄淳曜六合皇慶攸
興自彼河汾奄齊七政時文惟晉世篤其聖欽翼昊天
對揚成命九區克咸謳歌以詠皇上纂隆經教弘道干
化旣豐在工載考俯釐庶績仰荒大造儀刑祖宗妥綏
天保篤生我后克明克秀體輝重光承規景數茂德淵
冲天姿玉裕蕞爾小臣邈彼荒遐弛馭負擔振纓承華
匪願伊始惟命之嘉

皇太子賜讌詩

明明隆晉茂德有赫思媚上帝配天光宅誕育皇儲儀
刑在昔徽言時宣福祿來格勞謙降貴肆敬下臣肇彼
先驅翻成嘉賓

贈馮文罷遷斥丘令

八章

於皇聖世時文惟晉受命自天奄有黎獻闡闔既闢承
華再建明明在上有集惟彥

奕奕馮生哲問允迪天保定子靡德不鑠邁心玄曠矯
志崇邈遵彼承華其容灼灼

嗟我人斯戢翼江潭有命集止翻飛自南出自幽谷及

爾同林雙情交暎遺物識心

人亦有言交道寔難有頽者弁千載一彈今我與子曠
世齊歡利斷金石氣惠秋蘭

羣黎未綏帝用勤止我求明德肆于百里僉曰爾諾俾
民是紀乃眷北徂對揚帝祉

疇昔之遊好合纏綿借曰未給

一作洽

亦既三年居陪華

幄出從朱輪方驥齊鑣比迹同塵

之子既命四牡項領遵塗遠蹈騰軌高騁慶雲扶質清
風承景嗟我懷人其邁惟永

否泰有一作苟

一作殊

窮達有違及子春華後爾秋暉逝將去

四言古詩 卷十五 三十四
我陟彼朔陲非子之念心孰爲悲

贈潘尼

一作贈潘岳

水會于海雲翔于天道之所混孰後孰先及子雖殊同
升太玄舍彼玄冕襲此雲冠遺情市朝永志丘園靜猶
幽谷動若揮蘭

贈弟士龍

十章序曰余弱年夙孤與弟士龍銜卹喪庭續會逼王命墨經卽戎時並縈髮

悼心告別漸歷八載家邦顛覆凡厥同生彫落殆半收迹之日感物興哀而龍又先在四時迫當祖載二昆不容追遙銜痛東徂遺情西慕故作是詩以寄其哀苦焉

於穆予宗稟精東嶽誕育祖考造我南國南國克靖實
繇洪績惟帝念功載繁其錫其錫惟何玄冕袞衣金石

假樂旄鉞授威匪威是信稱平遠德奕世台衡扶帝紫
極

篤生三昆克明克俊遵塗結轍承風襲問帝曰欽哉纂
戎列祚雙組式帶綬章載路卽命荆楚對揚休顧肇敏
厥績武功聿舉烟熅芳素綢繆江滸昊天不弔胡寧棄
予

嗟予人斯胡德之微闕彼遺軌則此頑違王事匪盥於
旆屢振委籍舊戈統厥征人祈祈征人載肅載閑駢駢
戎馬有 有翰昔子翼考惟斯伊撫今予小子繆尋末
緒

有命自天崇替靡常王師乘運席卷江湘雖守守

從武臣守局下列譬彼飛塵洪波雷擊與衆同泯顛跋

西夏收迹舊京俯慚堂構仰悽一作惟先靈孰云忍愧寄

之我情

伊我俊弟咨爾士龍懷襲瑰瑋播殖清風非德莫勤非
道莫弘垂翼東畿耀穎名邦綿綿洪統非爾孰崇依依
同生恩篤情結義存並濟胡樂之悅願爾偕老攜手黃

髮

昔我西征扼腕川湄掩涕卽路耀袂長辭六龍促節逝
不我待自往迄茲曠年八祀悠悠我思非爾焉在昔並

垂髮今也將老銜哀茹感契濶克飽嗟我人斯胡卹之
早

天步多艱性命難誓常懼隕斃孤魂殊裔存不阜物沒
不增壤生若朝風死猶絕景視彼浮遊方之僑客眷此
黃廬譬之斃宅匪身是去亮會伊惜其惜伊何言紆其
思其思伊何悲彼曠載

出車戒塗言告言歸蓐食驚駕夙興宵馳濛雨之陰炤
月之輝陸陵峻坂川越洪漪爰屆爰止步彼高堂失爾
羽邁良願中荒我心永懷匪悅匪康

昔我斯逝兄弟孔仁今我來思或彫或疚昔我斯逝族

四言古詩 卷十五
有餘榮今我來思堂有哀聲我行其道鞠爲茂草我履其房物存人亡拊膺滂泣血淚彷徨

企佇朔路言送爾歸心存言宴日想容輝迫彼窀穸載驅東路繼其桑梓肆力丘墓婉兮變兮興懷罔極眷言顧之使我心惻

答賈謐

十一 韋序曰余昔爲太子洗馬魯公賈長淵以散騎常侍侍東宮積年余出補吳王郎中今元康六年入爲尚書郎魯公贈詩一篇作此詩答之云爾

伊昔有皇肇濟黎烝先天創物景命是膺降及羣后迭毀迭興邈矣終古崇替有徵

在漢之季皇綱幅裂大辰匿暉金虎曜質雄臣馳騫義

夫赴節釋位揮戈言謀王室

王室之亂靡邦不泯如彼墜景曾不可振乃眷三哲俾乂斯民啓土雖一作難改物承天

爰茲有魏卽宮天邑吳實龍飛劉亦岳立于戈載揚俎豆載戢民勞師興國玩凱入

天厭霸德黃祚告釁獄訟違魏謳歌適晉陳留歸蕃我皇登禪庸岷稽顙三江改獻

赫矣隆晉奄宅率土對揚天人有序斯祜惟公太宰光翼二祖誕育洪胄纂戎于魯

東朝旣建淑問戡戡我求明德濟同以和魯公戾止袞

四言古詩 卷十五 三十一
服委蛇思媚皇儲高步承華

昔我逮茲時惟下僚及子棲遲同林異條年殊志比服
舛義稠游跨三春情固二秋

祇承皇命出納無違往踐蕃朝來步紫微升降祕閣我
服載暉孰云匪懼仰肅明威

分索則易攜手實難念昔良游茲焉永歎公之二云感貽
此音翰蔚彼高藻如玉如蘭

惟漢有木曾不踰境惟南有金萬邦作詠民之胥好狷
狂厲聖儀刑在昔予聞子命

答潘尼

一作答潘岳

於穆同心如瓊如林我東日徂來餞其琛彼美潘生實
綜我心探我玉懷醕爾惠音

大將軍宴會被命作詩

六章

陸雲

皇皇帝祜誕隆駿命四祖正家天祿保安

一作

定獻哲惟

晉世有明聖如彼日月萬景攸正

巍巍明聖道隆自天則明分爽觀象洞玄陵

一作

風叶

極

一作

絕輝照淵肅雍往播福祿來臻

在昔奸臣稱亂紫微神風潛駭有赫茲威靈旗樹旆如
電斯揮致天之屈于河之沂有命再集皇輿凱歸

頽綱既振品物咸秩神道見素遺華反質辰晷重光協

風應律函夏無塵海外有謐

芒芒宇宙天地交泰王在華堂式晏嘉會玄暉峻朗翠

雲崇謁冕弁振纓藻服

一作垂帶

祁祁臣僚有來雍雍薄言載考承顏下風俯覲嘉客仰
瞻玉容施已唯約于禮斯豐天錫難老如岳之崇

征西大將軍京陵王公會射堂皇太子見命作此

詩六章

芒芒太極玄化烟熅頽形成器凌象垂文大鈞造物庶
類羣分先識經始實綜彝倫

惟岳隆周生甫及申天鑒在晉祚之降神邈矣遐風茂

德有鄰永言配命唯晉之鎮

厥鎮伊何實幹心膺文教內輔武功外禦淮方未靖帝

曰攸序公于出征奄有南浦

南海旣賓爰戢干戈桃林釋駕天馬婆娑象齒南金來

格皇家絕音協徽宇宙告和

玄綱峻極天罔旣紘文武方升允茲兼弘峩峩高夏有
肅其涼公侯戾止駉驥龍驤善問如林在會鏘鏘

祝融御節火正緝熙凱風徘徊萬物欣時秩秩初筵薄

言在茲嘉福介祐萬壽無期

大安二年夏四月大將軍出祖王羊二公於城南

四言詩 卷十五 三十九
堂皇被命作此詩 六章

時文唯晉天祚有祥聖宰作弼受言既臧有赫斯庸勳
格昊蒼景物台暉棟隆玉堂

惟常思庸大興光迪聖敬遠躋神道玄邈思媚三靈誕
膺天篤嘉命既辱主人言告

翼翼王人言告惟慕公輿駕言乃眷斯顧華旂飛藻鳴
鸞振路駢駢駟牡噓天載步

我有高夏如雲斯蒼彫軒戾止薄言嘉會問誰在宴惟
俊惟又豐俎殷薦獻酬交泰

攸攸昊天南正興言朱明有暉萬葉翠繁昌雲垂天凱
風熙顏王臣在此貽宴于懽

懸象西頽虞淵納景嘉樂未晞嚴駕已整行矣征人身
乖路永飛驂顧懷華蟬引領遺思北京結轡臺省

太尉王公以九錫命大將軍讓公將還京邑祖餞
贈此詩 六章

烈文辟公時惟哲王闡縱絕期平顯幽光內實慎徽緝
熙有臧出紂方慝間督不揚高山峻極天造芒芒

天子念功大典光備肅肅王命宰臣蒞事穆矣淵讓遺
功遂志思我遠猷德音孰嗣

后命既靈王人反旆興言出祖飲餞于邁於旒泱泱

軒藹藹和風弭塵清暉映蓋

思樂中陵言觀其川公王戾止有車麟麟伊誰云饗我有嘉賓羽觴舉酬酢爾征人

悠悠征人四牡駢駢發軫北京振策紫微昔乃云來春林方輝歲亦暮止之子言歸道塗興戀伏載稱微

聖澤旣渥嘉會惜惜庭旅鐘鼓堂有瑟琴飛轡清暉扶桑移陰視景祇慕揮袂沾襟變彼同栖悲爾異林我有旨酒以歌以吟

從事中郎張彥明爲中護軍

六章

思文有聖獻哲配天功濟生黎道合上玄休命發揮有

集惟賢哲彼寤宿澄此在淵

濟濟多士實播令聞王曰欽哉余嘉乃勲徽音孔碩惠爾風雲穆此芳烈肇揚清芬

肅肅庶僚袷服寵暉肇彼桃蟲假翼翻飛出撫邦家入翔紫微有命旣集願言永違

思樂華堂雲構崇基公王有酒薄言饗之景曜微芒芳風詠時宴爾賓儉具樂于茲

亶亶我王豐恩允臧我客戾止飲酒公堂自彼下僚聿來有光悲矣永言指途逝將形違殿闈景附華房

開國承家勿用小人今我聖宰實蕃斯仁凌淵龍躍披

林鳳振正直既好嘉禮式陳振我遠德歸于時民

贈汲郡太守

八章序曰奚世都為汲郡太守客將之官大將軍崇賢之德既遠而厚下

之恩又隆非此離析有感聖皇既蒙引見又宴于後園感鹿鳴之宴樂咏魚藻之凱歌而作是詩

於穆皇晉豪彥實蕃天罔振維有聖貞觀鳴鳥在林良駿即閑萃彼俊乂時亮庶官

抑抑奚生天篤其淳芳穎蘭揮瓊光玉振沈機照物妙思考神思我善問觀德古人

善問伊何惠音孔韶肇允衡門翻飛宰朝肅雍芳林芬響凌霄穆矣和風育爾清休

亦既有試出宰邦家之子于行民固謳歌風澄俗儉化靜世波芒芒既庶且樂于和

我有好爵既成爾服入贊崇華遂登帷幄時文聖宰天祚方穀朔風徽止鴻漸雲嶽

悠悠斯民三代直道我求明德惟奚攸考緝熙暉章天祿來保惠心無競豐化有造

樂只君子茂德攸綏嗟我懷人式是言歸聿言來集如翼斯揮日子不惠照爾清暉

職思既殊亦各有司念我同僚悲爾異事之子之遠悠悠我思雖無贈之歌以言志

贈顧驃騎二首

有皇大晉時文憲章規天有光矩地無疆神篤斯祜本
顯克昌載生之雋實惟祈陽哲問宣猷考茂其相
於鑠祈陽誕鍾天篤清輝龍見玄猷淵嘿沈機響駭幽
神廣覲和以同人歸物時育有大惡盈謙以自牧思我
懿範萬民來服

吳未喪師天秩有庸淵哉若人弱冠休風俯翼黃門以
德來忠端秀蕃后正色儲宮徽音鑠穎邈矣遐蹤

皇維南終舊邦匪歆委弁釋位如龍之潛考槃窮谷假
樂豐林子雖藏器鐘鼓有音惠風往敬慶問來尋

濟濟元公相惟天子明明辟王思隆多士帝曰欽哉有
命集止我咨四方令問在爾以朕大賚乃膺嘉祉聿來
胥步觀國之紀

惟皇建極緝熙清曜我有峻民明德來照大觀在上王
假有廟顯允顧生金聲玉振之子于升利見大人龍輝
絕跡有肅清塵

清塵旣彰朝虛好爵敬子侯度慎徽百辟予聞有命德
禮不易嗟我懷人瞻言永錫豐祐東法惟子之績

遵汶涉泗言告同征勁風宵烈湛露朝零雲垂藹下泉
冽清泠哀哉行人感物傷情從子京邑言觀厥成天保

祚德式穀以寧

右有皇

八章美祁陽也祁陽秉文之士駿發其聲故能明照有吳入顯乎晉國人美之而作是詩焉

思文祁陽祁陽克峻天錫純嘏宣茲義問德音既烈海外有奮既奮斯音祇敬厥德昭治其家覃及邦國永肇儀刑俾民惟則

文王在上太姒思齊魯侯克昌亦賴令妻鑒神有顧蘋蘩在斯祁陽載天作之伉儷

在虞之胄實惟有姚穎艷玉秀華茂桃夭居顯祇明在靈格幽清塵熠爍淑心綢繆爰及祁陽惟德之周

其德伊何和貞虔告師民履素言謀慮度鐘鼓思樂靖端夙效考休攸嬪來嫁于顧

羔羊執贄玉帛有輝百兩集止之子于歸宗姻風從娣姪雲回祁陽顧之煥其盈闈

既曰歸止式揚好音言觀河洲有集于林思樂葛藟薄采其蕈疾彼攸遂乃孚惠心

惠心既孚有恪中饋敦此衆斯永錫嗣類載延窈窕用和寤寐神之聽之胤祚來爾

昔周之隆有任有姒內刑聖敬外崇多士今我淑人實亮君子疊疊翼翼亦繼斯祉宜爾子孫福祿盈止

右思文

八章美祁陽也祁陽能明其德刑于寡妻以至于家邦無思不服亦賴賢妃貞女以成其內教故作是詩焉

贈顧尚書

五嶽降神四瀆炳靈兩儀鈞陶參和大成兆光人倫誕育至英於顯尚書實惟我兄行成世則才爲時生體道既弘大德允明厥弘伊何靡曠不遵厥明伊何靡妙不研無索炤灼有求幽玄細微不錯毫芒以陳積篲爲山納流成淵扶翹布華養物作春所肅以禮所潤以仁宣質拔行曜文入采堅不可鑽清如凝水方迹迎服蹈齊闕里晞聖而惟亦顧之子彼棄芝英玩此蘭茝異世同

芳其馥不已我蘭既馥我風載清能芬南岳運芳北征子有其德人求其馨逝此陋巷薰彼紫庭厥音不已鼓鐘有聲聞天之聰譬之鵠鳴天聰既招我實惟彰乘風之鳳眷言朝陽披雲藻綉來此舊鄉謙光自抑厥輝愈揚麗容魁翕孔好已張既照平林具我華英華英已曜餘光難延會淺別速哀以紹欣追曠同塗暫和笑言殊音合奏曲異響連絕我懽條統我思因根分來在愛感往思我非形景有處有遊載離載會且懽且憂感彼遠曠爰此延娛樂奏聲哀言發涕流唯願我子德與福俱亦天之祐亦我之私

四言古詩 卷十五
贈顧彥先

五章

玄黃挺秀誕受至真行該其高德備其新光瑩之偉隋
卞同珍騰都之駿龍鳳合塵

皇皇明哲應期繼聲華映殊域實鎮天庭入輔出輔乾
乾靡寧夏發涼臺我雨我暑冬違邦族風霜是處嗟彼
獨宿誰與晤語飄飄艱辛非禹孰舉言念君子悵惟心

楚

悠悠山川驍驍征遐陟升嶠嶢降涉洪波言無不利乘
嶮而嘉人懷思慮我保其和

邂逅相遇良願乃從不逢知己誰濟予躬莫攀莫附媿
我高風時過年邁晡冉桑榆晞光賴潤亦在斯須假我
夷塗頓不忘驅汜予津川桴不失浮無愛餘輝遂暗東
嶠

幽幽東嶠戀彼西歸瞻儀情感聆音心悲之子于邁夙
夜京畿王事多難仲焉徘徊

贈鄱陽府君張仲膺

五章

神林何有竒華妙實皇朝如何窮文極質斌斌君子升
堂入室太上有曜子誕其輝知機日難子達其微入輔
幃幄出御千里滔滔江漢南國之紀

謁帝東堂剖符南征天子命我車服以榮何以潤之德

四言古詩 卷十五 四十一
被蒼生何以濟之威振羣城却愚以化崇賢以仁鳳舒
其翮龍濯其鱗憶彼荒藪莫敢不賓雖云舊邦其命維
新

卞和南金終始一色顯允君子窮達一德弘仁厲道物
究其極古賢受爵循墻虔恭今哲居貴履盈如冲接新
以化愛舊以豐隆此嚶鳴惇彼谷風

忠至寵加孝至榮集內崇南芬外清名邑煒煒棠棣夙
增其華猗猗桑梓厥耀孔多被繡畫行昔人攸羨階雲
飛藻孰與同粲

人道伊何難合易離會如升峻別如順淇嗟我懷人曷

云其來貢言執手涕既隕之

贈鄭曼季 四首

習習谷風扇此暮春玄澤隆潤靈爽烟煜高山熾景喬
木興繁蘭波清躍芳許增涼感物興想念我懷人

習習谷風載穆其音流瑩鼓物清塵拂林霖雨嘉播有
滄淒陰歸鴻逝矣玄鳥來吟嗟我懷人其居樂潛明發
有想如結予心

習習谷風以溫以涼玄黃交泰品物含章潛介淵躍候
鳥雲翔嗟我懷人在津之梁明發有思凌波褰裳

習習谷風其集惟高嗟我懷人於焉逍遙鸞栖高岡耳

想雲韶拊翼墜夕和鳴興朝我之思之言懷其休

習習谷風其音孔嘉所謂伊人在谷之阿虎質山嘯龍

輝淵蟠維南有箕匪休其和有抃斯畢俾爾滂沱懿厥

河漢惟彼太華明發有懷我勞如何

右谷風

五章懷思也君子在野愛而不見故作是詩言其懷思之也

鳴鶴在陰戢其左翼肅雍和鳴在川之側假樂君子祚

爾明德思樂重虛歸于其極嗟我懷人惟馨黍稷

鳴鶴在陰其鳴喈喈垂翼蘭沼濯清芳池假樂君子其

茂猗猗底之瑰寶有餐瓊瓌乃振袞裳襲爾好衣嗟我

懷人啓襟以晞

鳴鶴在陰其儀藹藹謂天蓋高和音于邁假樂君子篤

膺俊乂穆風潛烈興雲戢奮德茂當年時衍嘉會安得

顰藻改爾縞帶嗟我懷人心焉忼愾

鳴鶴在陰載好其聲漸陸儀羽遵渚回涇假樂君子祚

之篤生德耀有穆如瑤如瓊安得風帆深濯髴滅景遺

雲雨爾在北冥嗟我懷人惟用傷情

右鳴鶴

四章美君子也太平之世君子猶有退而窮居者樂天知命無憂無欲頌人之

考繫傷有德之遺世故作是詩也

南衡惟岳峻極昊蒼瞻彼江湘惟水泱泱清和有合俊

乂以臧天保定爾茂以瓊光景秀濛汜穎逸扶桑我之

懷矣休音峻揚

穆穆休音有來爾雍沈波涌奧淵芳馥風僚虛養恬照
日遺蹤考槃遵渚思樂潛龍我之懷矣冥爾華宮
和璧在山荆林玉潤之子于潛清輝遠振克稱輜德作
寶有晉和聲在林羽儀未變我之懷矣有客來信
風雲有作應通山淵清琴啓彈宮商乘絃類族知感有
命自天夷叔希世猶謂比肩矧我與子姤會斯年
我之懷矣在彼北林北林何有於煥斯文瓊瑰非寶八
牘成珍豐華非妙得意惟神河魴登俎遺答清川

右南衡

五章美君子也言君子邈世不問以德存身作者思其以德來仕又願言就之

宿感白駒之義而作是詩焉

瞻彼高岡有猗其桐允也君子實寶南江員規啓俗沈
矩履方泳此明流清瀾川通陟彼衡林味其回芳
馥馥回芳綢繆中原祁祁庶類薄采其芬栖遲泌丘容
與衡門聲播東汜響溢南雲

穆穆闔闔南端啓籥庶明以庸帝聽式闕有鳳于潛在
林栖翮非予之祚孰與好爵

幽居玩物顧景自頤發憤潛惟伋佛有思予美忘此終
然胥來企予與言惟用作詩

右高岡

四章

答吳王上將顧處微 九章

邈矣大昧造化明明物以曲全人以直生類聚百族羣
分萬形員淵挺隋方川吐瓊

藹藹洪族天祿攸蕃神綏厥本道裕其源條有豐葉波
無輟瀾烈風時播芳響世繁

曰繁曰頤載德于茲克文克敏乃惠乃慈遵彼洪流薄
言詠之好是神契聊與之期

仁勇同宅文武相紛王謂御事誰撫上軍於時翻飛虎
嘯江濱式遏不虞俾也無塵

三代既遠直道垂音非齒焉尚非德孰欽鑽仰自古鮮

曰在今匪唯形交殷薦其心

心以殷薦分以道成祗服惠顧疇此深情亦有芳訊薄
載其誠豈無春暉茲焉可榮

大道易聞崇軌難襲孰云匪衍咎吝尤集敢謝不佞栖
山自戢臨篇焉愧德輶辭輯

翩彼日月逝猶駭電朝華未厭夕風已扇詩亦有悲無
幾相見懷德歎心于焉東眷

平津晚貢貢公後徵陟彼玉階黃髮來升靈卉三秀芳
草秋興唯願清神福祿是膺

答大將軍祭酒顧令文 五章

四言古詩 卷一五
惟林有鸞惟淵有螭顯允明德實邦之基先后陟恪子
配于茲遵彼玉堂受言邁之

中原有軌世鮮克蹈先民有懷子探其妙心猶水鑒面
景內照名若振炎攄光外耀

相彼水鑒民胥攸臨矧曰明德人誰弗欽寫我朶頤卽
爾澄心義隆自古好邈在今

大人有作興雲自天之子于升亦躍于淵景曳清霄響
發鳴弦義問弘集淑風載鮮

企予朔都非子孰念豈無弱翰才不克瞻惠音聿來瓊
華玉艷無德不報念辭惟忝

答兄平原

伊我世族太極降精昔在上代軒虞篤生厥生伊何流
祚萬齡南嶽有神乃降厥靈誕鍾祖考徹茲神明運步
玉衡仰和太清賓御四門旁穆紫庭紫庭旣穆威聲爰
振厥振伊何播化殊鄰清風攸被率土歸仁彤弧所彎
萬里無塵功昭王府帝庸厥勲黃鉞授征錫命頻繁闕
如馭虎肅茲三軍光若辰時亮彼公門仍世上司芳流
慶純雲和所產爰育二昆誕豐岐嶷夙邁令聞令聞伊
何休音允臧先公克構乃崇斯堂耀穎上京發迹扶桑
戎車山征時惟鷹揚鷹揚旣昭勲庸克邁天子命我鎮

彌于外在作扞城以表南裔降災匪蠲景命顛沛惟我
賢昆天姿秀生含竒播殊明德惟馨太陽散氣乃稟厥
和山川垂度爰則厥遐厥遐伊何惟光惟大惟大伊何
如岱如渭恢此廣淵廓彼洪懿弘道惇德淵哉爲器統
我先基弱冠慷慨將弘祖業實崇奕世咨予頑蒙蕞爾
弱才沈耀玄渚挹庇雲淇陶化靡移固陋于茲瞻仰洪
範實忝先基巍巍先基重規累構赫赫重光遐風激鷺
昔我先公爰造斯猷今我六蔽匪崇克扶悠悠大道載
邈載遐洋洋淵源如海如河昔我先公斯綱斯紀今我
末嗣乃傾乃圯世業之頽自予小子仰愧靈丘銜憂沒

齒憂懷惟何顧景惟塵莪莪高蹤眇眇賀辰明德繼體
莫非哲人今我頑鄙規範靡遵仍世載德荒之予身莫
峻匪岳有峻斯登莫高匪雲有高斯凌矧我成基匪克
階升玄黃長坂載寐載興豈敢憚行哀此負乘芒芒高
山自予頽之濟濟德義匪予懷之終銜永負于其媿而
昔予言曠汜舟東川銜憂告辭揮淚海濱義陽趣駕炎
華電征自我不見邈哉八齡悠思迥望寤言通靈昔我
往矣辰在東嶠今我于茲日薄桑榆銜艱邁愍困瘁殷
憂哀矣我世匪蒙靈休開元迄茲震興迭微弱風隱駭
海水羣飛王旅南征闡耀靈威予昆乃播爰集朔土載

離永久其毒太苦上帝休命駕言其歸多我邁愍振蕩
 朔垂羈繫殊俗初願用違嚴駕東征肅邁林野夕秣乘
 馬朝整僕旅矯矯乘馬載驅載馳漫漫長路或降或階
 晨風夙零朝不皇饑傾景儵墜夕不存罷雖有豐草匪
 釋奔駟雖有重陰匪遑遐寐矻矻僕夫悠悠邁征經彼
 喬木有鳥嚶鳴微物識儕矧伊有情樂茲棠棣實歡友
 生既至既覲滯思曠年曠年殊域覲未浹辰恨其永懷
 憂心孔艱天地永久命也難長生民忽霍曷去其常我
 之既存靡績靡紀乾坤難並寂焉其已生若電激沒若
 川征存愧松柏逝慚生靈匪吝性命實悼徒生苟克析
 薪豈憚冥冥瞻企皇極徼福上天冀我友生要期永年
 昔我先公邦國攸興今我家道綿綿莫承昔我昆弟如
 鸞如龍今我友生凋俊墜雄家哲永徂世業長終華堂
 傾構廣宅頽墉高門降衡脩庭樹蓬感物悲懷愴矣其
 傷惇仁汜愛錫予好音晞光懷寶煥若南金披華玩藻
 曄若翰林詠彼清聲被之瑟琴味此殊響慰之予心弘
 懿忘鄙命之反覆敢投桃李以報寶一作珠玉冀憑光蓋
 編諸末錄

答顧秀才 五章

芒芒上玄有物有則厥初造命立我藝則爰茲族類有

四言古詩 卷十五 五十三
覺先識斯文未喪誕育明德

允矣顧生載靈之和沈根芳沼濯秀蘭波淵翹戢穎景
茂凌華惟是德心是用閑邪

德心伊何行歸于周希高仰峻企遠懷悠匪願在明靡
倦斯幽凡我同朋瞻言清休

慎終于遠俾民歸厚言若有行及予攜手何以恤我其
仁孔有心之云愛隆敬其久

既邁斯仁亦迪茲文藻不雕樸華不變淳有斐君子如
珪如璠仰欽德類依懷惠詮式揚好問邦家于宣

答孫顯世 十章

邈矣上祖垂休萬葉廣問弘被崇軌峻躡高山克荒大
川利涉繁藹惟祐風連雲接

大人有作二后利見九功敷奏七德殷薦鼎實重芳勞
烈再扇奕世弘道天祿來宴

道弘振古祚未替今如彼在川亦有浮沈大韶既素響
非我音豈曰荒止塗弗克尋

昌風改物豐水易瀾百川總紀四海合源在彼焉取聿
來莫觀曾是褊心敢忘丘園

員暉偏照玄澤謬盈發彼承華頓此增城紀景靈雲倦
遊紫庭匪曰能知寔忝長纓

四言詩 卷十五 五十四
煥矣金虎襲我皇猷孰云匪忒仰媿蒼流往蹇來反弭
迹一丘變彼東朝言卽爾謀

振振孫子洪族之紀志擬龍潛德配麟趾引服朗節克
明峻軌遵彼中臯於穆不已

於穆不已大都是階之子于命民膺如隕厚德時邁協
風允諧惠此海湄俾也可懷

乃眷丘林樂哉河曲解紱披褐投印懷玉遺情春臺托
蔭寒木言念伊人溫其在谷

道俟人行辭以義輯和容過表余未云執惠音弘播清
風駿集懷德形撫臨篇景立



811.12
2342